

imminet, in quo mihi promissum est obire atque abire cum angelis. Inde est, quod in adventu infirmatus et desperatus a vobis unctionem tunc renui, sciens me usque in pascha differri. En hora jam instat promissa et novissima mihi'.

In toto monasterio personuit istud fratrem Joseph prophetasse de morte sua, et grandis exspectatio, donec impleretur prophetia. Et impleta est, non sine dolore tamen, optantibus ceteris ut viveret, quod magnum aliquid de illo futurum sperarent. Hec spes confudit eos, ipsorum vota precurrens, et quod sperabatur in longum fore, jam tunc in illo factum ostendens, obiit Joseph sicut predixerat ipse, quidquid est christiani juris accipiens, acceptus ipse Christo in odorem suavitatis et deductus in pace ab angelis pacis. Quarta feria pasche dum de mensa surgitur cene, ad cenam agni vocatur Joseph, atque ad exequias ejus vocati conveniunt omnes. Tollitur ex more corpusculum, nudatur ad lavandum, a paucis tamen idemque brevissimum; nam protinus est cum stupore et admiratione reiectum. Ceterum fama detegitur cunctis, feminam esse, que obiit, et in commendatione, quam abbas interim fecit, genus masculinum in femininum transivit. Stupent litterati omnes, audientes feminam commendari, et inter longa suspiria mirabantur virtutem Christi, cujus amore et ope fragilis hec oblita sit sexum, inierit atque finierit prelium, triumpharit inimicum. Effertur ad laicos fama: turbantur, mirantur et stupent magis ipsi, quod in puella tam tenera diabolo illusisset Dei virtus et dei sapientia Christi. Et quod dictum fuerat priori in tenebris, ipse dicit in lumine; quod in aure quisque audierat, predicabat in tectis. Laudatur ab omnibus et benedicitur Deus in donis suis. Reor et hoc ordinis nostri quaecunque preconium, quod virgo Christi tot agonibus fatigata, nec victa, dum ab angelo transitus sui tempus et felicitatem agnovit, nusquam sibi tutius Deoque laudabilius quam in religione nostra finiri se credidit. Fortiter siquidem et non diu in bello factura fortes pugnans aggressa est, ut regi suo tanto cresceret gloria, quanto [in]firmiori militi fieret a forti hoste victoria.

Velim hanc miraculo feminis, viris exemplo, ut glorientur ille, illi erubescant, quod hodieque non desint in feminis, que pro Christo audeant fortia, quod in viris pars maxima mulierum sectantur infirma. Nulli tamen feminarum similia suaserim, quia multis par fortitudo, sed dispar est fortuna, et eodem belli discrimine sepe cadit fortior, quo vincit infirmior.

Hujus relationis testem habemus in domo, qui in obitu et exequiis puelle presens fuit, referens nobis quod audivit ipse et vidit. Siquidem in pascha hujus anni res accidit, qui est annus ab incarnatione Domini MCLXXXVIII. Ceterum abbas ille rei novitate attonitus vitam puelle sciscitare plenius voluit, ipsam ab inclusa investigare perrexit, scripturus eam